

Qanoq iliorkuni suliffeqarfiit namminersorlutik oqartussat tamakkiisumik ilaannakortumilluunniit pigisaat allagaatinik takunnissinnaatitaaneq aqqutigalugu paasissutissanik aallerfigineqarsinnaangorlugit, Pisortat ingerlatsinerat pillugu Inatsisartut inatsisaat nr. 9, 13. juni 1994-imeersup malitsigisaanik nalunaarutip nr. 78, 30. december 2021- meersup ilaneqarsinnaanera pillugu apeqquteqaat aallaavigalugu oqallisissiaq.

(Inatsisartunut ilaasortaq, Doris J. Jensen, Siumut)

Akissuteqaat

(Naalakkersuisut Siulittaasuut)

Siullermeerneqarnera

Allagaatinik takunnissinnaatitaaneq pillugu aalajangersakkat Namminersorlutik Oqartussat piginneqatigiiffiit atuutsilersinneqarsinnaanersut pillugu apeqquteqaat aallaavigalugu oqallisissiamut Naalakkersuisut aallarniutigalugu qujapput.

Allagaatinik takunnissinnaatitaaneq pillugu aalajangersakkat Namminersorlutik Oqartussat piginneqatigiiffiit atuutsilersillugit nalunaarutip ilaneqarnissaanut, inatsisitigut tunngavissani atuuttuni tunngavissaqanngilaq.

Aktianik piginneqatigiiffimmik ingerlatsineranut aningaasartuutit amerlanersaat Namminersorlutik Oqartussanit akilerneqartarpata, imaluunniit aktianik piginneqatigiiffik INI A/S assigalugu Namminersorlutik Oqartussat sinnerlugit aalajangiinissaminut piginnaatinneqarsimappat, nalunaarut aktianik piginneqatigiiffimmik aatsaat atuutsilersinneqarsinnaavoq.

Aktianik piginneqatigiiffinnut atuutsilersinneqassappat, taamatut suliniut paasitinneqarsinnaatitaanermut inatsimmut allannguutissatut siunnersuuteqarnikkut oqaluuserineqartussaassaaq. Tamatuma saniatigut isornartoqanngitsumik ingerlatseqatigiiffinnut atuutsilersinneqassappat, unammilleqatigiinnermut tunngallutik ajornartorsiutaasinnaasut eqqarsaatigineqassapput.

Ingerlatseqatigiiffiit inuiaqatigiinni ingerlatsisinnaanerat eqqarsaatigalugu, namminersortunit pigineqarlutik aktianik piginneqatigiiffinnut atugassarititaasut assigalugit, Namminersorlutik Oqartussat aktianik piginneqatigiiffiisa unammillersinnaanissaat Naalakkersuisunut pingaaruteqarpoq. Namminersorlutik Oqartussat aktianik piginneqatigiiffii nunatsinni inuiaqatigiinni assigiinngitsunik ingerlataqarmata aamma eqqarsaatigineqartariaqarpoq. Assigiinngitsorujussuarnik ingerlatsippat, unammillerneqarsinnaanermikkullu assigiinngitsunik inissisimaffeqlutik.

Namminersorlutik Oqartussat aktianik piginneqatigiiffiit sinaakkutini atuuttuni, assigiimmik iluaqutitaqartitsinissaq Naalakkersuisunit tunngavissumik anguniarneqarpoq. Tamanna ima paasineqassaaq, suliffeqarfimmik namminersortumit pigineqartumut

sanilliullugu ingerlatseqatigiiffik Namminersorlutik Oqartussanit pigineqaruni tamanna immikkut ittumik ajoqutitaqassanngitsoq, immikkulluunniit ittumik iluaqutitaqassanngitsoq. Ammasuunissamut pisariaqartitsineq paasinninnissamullu periarfissaq inatsisip atuuttup sinaakkutaasa iluini iluarsineqarluni, assigiimmik periarfissaqartitsisoqartariaqarpoq.

Namminersorlutik Oqartussat aktianik piginneqatigiiffii ukiumut nalunaarusiamikkut, ingerlatseqatigiiffittut nassuiaatimikkut, politikikkut eqqartuinikkut il.il. ingerlatsinertik pillugu paasissutissiisarnerat nalinginnaasumik qaffasippoq. Taassuma saniatigut ammasumik ataatsimeersuartitsisarnerit ingerlatseqatigiiffiit ingerlatsinerinik, aqutsinerinut, aningaasatigullu inissisimanerinut paasisitsisarput.

Ammasuunissamik, isertuaatsuunissamillu kissaateqarneq Naalakkersuisut pingaartippaat. Taamaattumik piginnittuunermut politikkipillugu partiinut isumaqatigiinniarnermi qulequttat taakkua ingerlateqqinneqarnissaannik Naalakkersuisut aamma aallarniipput.

Naalakkersuisut taamatut oqaaseqarlutik Inatsisartuni oqallinnissaq qilanaaraat.